

Libenti animo huic sententiæ adharerem, si purgaretur a multis fabellis in apocryphis libris enarratis, nempe sanctam puellam in illo Asceterio permanisse usque ad annum ætatis quartumdecimum, educatam fuisse ad instar columbæ, nutritam cibo de manu Angeli accepto, & postea desponsatam Josepho viro justo, qui per miraculum fuit designatus ejus Sponsus: nam virga, quam Sanctus homo tenebat in manibus, floruit; columba, quæ ex eadem exiit, super caput ejus infedit. Relictis hisce fabellis, & Præsentatione Virginis purgata ab hisce apocryphis narratiunculis, Mysterium erit Præsentatio Virginis in templo facta a parentibus. Festum in Oriente antiquum erat: in Ecclesia Occidentali celebratum fuit sæculo decimo quarto cum officio particulari, quod iustis de causis abrogavit Pius V.

IX. Inter Mysteria Virginis illud Assumptionis merito cæteris celebrius est, ejusque solemnis dies jure decantatur ab Ecclesia uti præclara festivitas omnium Sanctorum festiuitatibus incomparabilis. Est enim Mysterium sui felicissimi transitus ab hac lacrymarum valle ad patriam æternæ felicitatis.

Quod mortua fuerit Beatissima Virgo, esto Sanctus Epiphanius Hæc. 78. nec affirmare, nec negare audeat, tamen certissimum est illam obiisse: quia si mortuus est Auctor vitæ Christus in carne, quam suscepit ex Matre; non erat dispensanda a lege mortis Mater, quæ Filio subministravit carnem, ut moreretur in illa.

Ignorantur circumstantiæ mortis Mariæ, sicut ignorantur illæ ejusdem Nativitatis. De causa mortis nil certum: unde liberum est cuique asserere, Mariam mortem subiisse, non ex mortiferis affectionibus corporis, sed ex plaga amoris, qua vulnerabatur in corde. De tempore, esto prævaleat opinio, illam obiisse anno ætatis sexagesimo tertio, tamen monumenta desiderantur, ut quid certi statuatur. De loco tandem sumus in tenebris, qualis fuerit, & ubi sit mortua. Verisimile est illam obiisse Ephesi, ubi Joannes Evangelista, cui a Christo moriente commendata fuit carissima Mater,